



Сыр бойы

Қызылорда облыстық қоғамдық-саяси газет • 1929 жылдың 1 шілдесінен шығады

№175
(20649)



16 қараша, бейсенбі 2023 жыл

e-mail: syrboi@yandex.kz

www.syrboi.kz



www.facebook.com/syrboi_kz/



www.instagram.com/syrboi_kz



https://twitter.com/syrboi



t.me/syrboi_kz

ПРЕЗИДЕНТ



ЗАҢ БӘРІНЕ БІРДЕЙ

Президент Қасым-Жомарт Тоқаев Ішкі істер министрі Ержан Сәденовпен, Бас прокурор Берік Асылөвпен, Жоғарғы Сот төрағасы Асламбек Мерғалиевпен, сондай-ақ басқа да салалық ведомстволардың басшыларымен кездесіп, консультациялар өткізді. Мемлекет басшысы заңның сақталуына, азаматтардың құқықтық санасы мен құқықтық мәдениетінің деңгейін арттыруға қатысты мәселелерге баса мән берді.

Қасым-Жомарт Тоқаевтың пікірінше, Заң мен Тәртіп қағидаты Қазақстан қоғамының идеологиялық және саяси темірқазығына айналуда тиіс. Қазіргі қалыптасқан жағдай көшедегі мәдениетсіздіктен бастап төбелес, ұрлық, кісі өлтіруге дейінгі құқықбұзушылықтың барлық түріне ымырасыз қарсы тұруды талап етеді.

Президент осындай келенсіздіктермен тұтас қоғам болып күресу керек деп санайды. Елімізде тұрмыстық зорлық-зомбылық, вандализм, дәрексіздік және бұзақылық сияқты Заң мен Тәртіп бұзушылықтың кез келген түріне мүдде төзбейтін әрі оны қатаң айыптайтын жағдай қалыптастыру қажет. Әйелдер мен балаларға зорлық-зомбылық көрсету фактілерінің батыл түрде жолын кесу керек.

Қасым-Жомарт Тоқаев Ішкі істер министрлігіне елорда мейрамханаларының бірінде болған кісі өліміне қатысты резонанс тудырған оқиғаны ерекше бақылауға алуды тапсырды.

– Заң бәріне бірдей. Азаматтарымыз заңдылықты нығайту жолында жұдырықтай жұмылса ғана қоғамда әділдік орнайды. Әділетті Қазақстан – Заң мен Тәртіп үстемдік құратын ел, – деді Президент.

Естеріңізге сала кетейік, Мемлекет басшысы Республика күні қарсаңында өткен жиында сөйлеген сөзінде Әділетті Қазақстанды құру үшін құқықтық мәдениетті дамыту қажет деген болатын. «Заңсыздық, тәртіпсіздік, мәдениетсіздік елді жарға жығады. Мұндай жағымсыз үрдіске бүкіл қоғам болып қарсы тұруымыз керек. Ал тәртіпке бағынған қоғам өркеніетті болады. Бұл – заңдылық. Әр азамат еліміздің заңын құрметтесе, береке-бірлік те, бақуатты тұрмыс та болады», – деді Қасым-Жомарт Тоқаев.

Президент кездесулер мен консультациялар барысында қоғамда әділдік пен тәртіп орнату үшін құқық қорғау органдары мен сот инстанциялары қызметкерлеріне айрықша жауапкершілік жүктелетінін атап өтті.

ЭНЕРГЕТИКА САЛАСЫНЫҢ НЕГІЗГІ МӘСЕЛЕЛЕРІ ТАЛҚЫЛАНДЫ

Мемлекет басшысы Энергетика министрі Алмасадам Сәтқалиевті қабылдады.

Президентке энергетика саласын дамытудың негізгі мәселелері мен еліміздің отын-энергетика кешенінің биылғы 10 айдағы көрсеткіштері, сондай-ақ мұнай-газ және энергетика бағыттарындағы ірі жобалардың жүзеге асырылуы жөнінде мәлімет берілді.

Кездесу барысында Алмасадам Сәтқалиев аталған кезең ішінде Қазақстандағы мұнай өндіру көлемі 74,8 миллион тоннаны, ал мұнай өнімдерінің өндірісі 11,2 миллион тоннаны құрағанын жеткізді. Сонымен қатар 48,7 миллиард текше метр газ, 93,5 миллиард кВт/сағ электр қуаты және 15,35 мың тонна уран өндірілген.

Қасым-Жомарт Тоқаевқа ұлттық электр желісін дамыту үшін атқарылып жатқан шаралар, биыл маусым айында іске қосылған электр энергиясын нарықта сатудың жаңа механизмі жөнінде баяндалды.

Мемлекет басшысына қысқы жылыту маусымы қалыпты өту үшін қосымша бақылау орнатылғаны туралы ақпарат берілді. Атап айтқанда, энергетика нысандарын қамтамасыз ету мақсатында 5,5 миллион тонна көмір мен 100 мың тонна мазут қоры дайындалған. Бұған қоса Мемлекет басшысына ведомствоның ел аймақтарына одан әрі газ құбырын тарту жоспары таныстырылды.

Кездесу соңында Президент жылыту маусымының барысын және энергетика инфрақұрылымын жаңғырту жобаларының іске асырылуын айрықша бақылауда ұстауды, сондай-ақ ішкі нарықты жанар-жағармаймен және сұйытылған мұнай газымен үздіксіз қамтамасыз ету шараларын қабылдауды тапсырды.

БАСПАСӨЗ – 2024

Құрметті оқырман!

2024 ЖЫЛДЫҢ БІРІНШІ ЖАРТЫЖЫЛДЫҒЫНА «СЫР МЕДИА» ЖШС-НА ҚАРАСТЫ ГАЗЕТТЕРГЕ ЖАЗЫЛУ ЖҮРГІЗІЛУДЕ.

«Сыр бойы» газетіне 6 айға жазылу бағасы: жекелер үшін – 4000 теңге, мекемелер үшін – 5000 теңге.



15 ҚАРАША – ҰЛТТЫҚ ВАЛЮТА КҮНІ

ТӨЛ ТЕҢГЕ – ТӘУЕЛСІЗДІКТІҢ БОЙТҰМАРЫ



Суретті түсірген Б.Есжанов

Отыз жылдан асқан тәуелсіздік тарихындағы мемлекет мәртебесінің өсуі мен экономиканың нығаюында теңгенің орны ерекше. 1993 жылы Ұлттық валюта енгізілген кезде облыс бюджеті бар болғаны 135 млн теңгені құраса, білікті қаржыгерлер жұмысының нәтижесінде еселеп артты. Бүгінде аймақ тайқазаны

609 млрд теңгеге жетті. Облыс құрылысы қарқын алған аймақтар динамика енді. Макроэкономикалық көрсеткіштер бойынша да оң қанатқа бар. Сыр өңірінің қаржыгерлер мектебі қалыптасып, өсіп-өркендеді.

Айсәуле ҚАРАПАЕВА, «Сыр бойы»

ҮКІМЕТ ОТЫРЫСЫ

ӨНДЕУ ӨНЕРКӘСІБІНДЕ ӨСІМ БАР



Фото: Ашық дереккөзден

Кеше ҚР Премьер-министрі Әлихан Смайыловтың төрағалығымен Үкімет отырысы өтті. Жиында биылғы қаңтар-қазан айларындағы өлеуметтік-экономикалық даму қорытындылары мен республикалық бюджеттің атқарылуы қаралды.

Биболат СӘТЖАН, «Сыр бойы»

2-бет

МЕДИАФОРУМ

МАСС-МЕДИА ТУРАЛЫ ЗАҢ ЖӘНЕ ЖУРНАЛИСТЕР ТАҒДЫРЫ



Түркістан қаласындағы Қожа Ахмет Ясауи атындағы Халықаралық қазақ-түрік университетінде медиақраттар медиафорумы өтті. «Масс-медиа туралы заң және журналистер тағдыры» тақырыбын

талқылауға арналған медиафорумға Түркістан, Алматы, Тараз, Қызылорда өңірлерімен қатар, Астана қаласынан Парламент депутаттары онлайн қатысты.

Қуат ШАРАБИДИНОВ, «Сыр бойы»

4-бет



ТУҒАН ӨҢІРДІҢ ТАБИҒАТЫ

Табиғи ресурстарды тиімді пайдалану, оны басқару қазіргі дамыған қоғамның ең маңызды мәселесі болып тұр. Сол үшін де табиғи ресурстардың сарқылуы – өзекті мәселе. Бұл тұста Табиғат-ананың берген сыйын кешенді қолдану маңызды десек, 85 жылдық тарихы бар аймақ дамуында облыстық табиғи ресурстар және табиғат пайдалануды реттеу басқармасының атқарып отырған қызметі ауқымды.

Биболат СӘТЖАН, «Сыр бойы»

ҚОРШАҒАН ОРТАНЫҢ ҚОРҒАНЫ

Өткенге көз жүгіртсек, 2004 жылға дейін облыстық орман және жануарлар дүниесін қорғау басқармасы мен табиғатты қорғау шаралары басқармасы екі бөлек жұмыс атқарып келді. 2005 жылы екі мекемені біріктіру туралы шешім күшіне еніп, облыстық табиғи ресурстар және табиғат пайдалануды реттеу департаменті болып жаңадан құрылды.

4-бет

